



Guia Electoral 2024:

Evalua bo politico: Sra. Marisol Tromp

PA haya un miho bista di e candidatonan prominente como politico, nos a evalua algun candidato prominente riba lista di MAS a base di un sistema cu 10 pregunta, manera publica den Guia Electoral di dialuna 18 november. E sistema aki ta evalua e prestacion y caracteristicanan cu un score di maximo 5 strea.

1. Integridad: E ta demostra honestidad y ta mantene su mes na normanan etico den tanto su bida personal como publico?

3 strea – A pesar di varios intento pa criminalis'e, ningun hende a logra. Su conviccionnan moral fuerte ta keda intacto.

2. Responsabilidad: E ta tuma responsabilidad pa su accion y decisionnan, tanto den exito como den eror?

4 strea – Su dedicacion pa haci lo corecto, hasta ora esey a costa su trabou como minister, ta demostra un gran sentido di responsabilidad.

3. Habilidadnan di Liderazgo: E por inspira y guia otronan pa logra metanan comun?

3 strea – Su carrera politico ta muestra cu e kier implementa su vision, tin biaha te na e punto di obsesion.

4. Habilidad di Papia: E ta comunica su vision, maneho y balornan na un manera cla y convincente?

4 strea – Un orador natural cu un capacidad enorme pa transmiti su mensahe.

5. Conocemento di Asuntonan: E ta bon informa riba asuntonan local, nacional y mundial?

3 strea – E tin conocimiento amplio, pero ta destaca vooral den infraestructura y asuntonan social.

6. Curashi: E ta para pa su conviccion y e interesnan di su votadonan, hasta ora esey ta impopular?

4 strea – Su conviccion a hib'e na bandona tres partido pasobra nan a pone nan propio interes riba esun di pueblo.

7. Compas Moral: E ta pone loke ta corecto riba loke ta politicamente beneficioso?

3 strea – E sa con pa haya un balans, pero tin biaha loke ta politicamente beneficioso no ta den e interes di pueblo.

8. Vision pa Futuro: E tin un vision cla y inspirador pa termino largo?

3 strea – Su vision ta cla, pero mas enfoca riba termino cortico y mediano. Asina mes e sa con pa inspira.

9. Etica di Trabou: E ta demostra dedicacion y perseverancia den su tarea y responsabilidadnan?

4 strea – E ta profesional te den detaye, hasta te na e punto di micromanagement.

10. Respet pa Institucionnan: E ta mantene e principionan di democracia y ta respeta e estado di derecho?

3 strea – E tin un vision cla riba democracia y ta muestra respet pa e estado di derecho.

Marisol Tromp ta papia cla y tin un vision cla. Aunke el a supera hopi obstaculo, e ta sigui dedica su mes na tuma decisionnan sincero, hasta ora esaki ta dificil. Su determinacion ta haci'e un politico motiva y respeta.

